

Qalam

Bilangan 96 Zulhijah 1377 Julai 1958 70 sen

Mari Berkorban!

Allāhu Akbar, Allāhu Akbar, Allāhu Akbar!

Demi Tuhan yang menjadikan alam semesta bahawa tidak ada saat yang lebih besar bagi umat Islam selain dari saat memperingati Hari Raya Korban, Hari Raya Aidil Adha, yang di dalamnya digambarkan pengorbanan yang maha besar yang belum pernah ada seumpamanya, iaitu pengorbanan yang dibuat oleh Nabi Ibrahim bersama-sama anaknya Nabi Ismail

‘Alayhi Wassalām.

Allāhu Akbar! Tidak ada seorang pun daripada kita yang tidak pernah mendengar pengorbanan itu tetapi tidak ada seorang pun daripada kita yang harus bertanya kepada dirinya: “Adakah kita telah memberi pengorbanan untuk Allah dan kerana Allah dalam menegakkan kalimah Tuhan?”

Allāhu Akbar! Kita telah banyak bercakap tetapi kita belum memberi pengorbanan dengan harta, tenaga dan jika perlu dengan darah pada jalan Allah, kerana itu marilah kita menyematkan azam di dada kita, di dalam menyambut Hari Raya Korban ini, dari satu masa ke satu masa bersedia berkorban untuk Allah dan kerana Allah dalam menegakkan kalimah Tuhan - *Āmīn*,
Allāhu Akbar, Allāhu Akbar, Allāhu Akbar Wa li'Llah al-Ḥamd.

* * *

Mengharamkan Kitab Agama

Perkara kitab Ibadat Rasulullah karangan al-Ustadh Abu Bakar al-Ashaari telah menggemparkan ulama al-Shāfi‘iyyah di Persekutuan Tanah Melayu. Pemegang mohor Majlis Raja-raja Melayu telah meminta kepada tiap-tiap negeri di Persekutuan mengambil tindakan untuk mengharamkan kitab itu, dan bahasan itu telah diadakan di beberapa negeri

di Persekutuan, dikecualikan Perlis. Negeri-negeri yang lain, kerana asas perlembagaannya, bahawa agama Islam yang dikehendaki ialah agama Islam mengikut mazhab al-Imām al-Shāfi‘i telah mengambil bahagian dalam hal ini sedang perlembagaan Perlis yang tidak mau mengambil bahagian dalam membahas perkara ini ialah kerana perlembagaan kerajaan Perlis tidak hanya berpegang kepada mazhab al-Imām al-Shāfi‘i sahaja - kerana itu Perlis tidak akan mengharamkan kitab itu.

Tatkala penasihat-penasihat agama kepada Majlis Raja-raja Melayu yang seramai 18 orang mengambil keputusan meminta Majlis Raja-Raja Melayu mengharamkan kitab yang tersebut maka ulama-ulama dari Perlis dikatakan tidak mencampurinya. Tuntutan ini telah berjalan selama hampir-hampir tiga bulan. Alasan yang diberi untuk mengharamkan kitab itu, sepanjang yang diketahui, ialah kerana kitab itu berlawanan atau bertentangan dengan “pelajaran al-Imām al-Shāfi‘i yang menjadi pegangan orang-orang Islam di negeri ini.”

Perkara yang besar di dalamnya ialah perkara tidak ada yang haram selain daripada empat perkara seperti yang tersebut di dalam Surah al-Mā’idah iaitu yang diharamkan hanya bangkai, darah, daging babi dan sembelihan-sembelihan yang bukan dengan nama Allah. Selain daripada yang tersebut adalah dihalalkan Tuhan sedang kalau adapun yang lainnya, jika ada manik yang menegahnya hanyalah nisbah kepada hukum makruh sahaja - tidak haram. Alasan yang diberi kerana tidak ada hak manusia mengharamkan apa yang dihalalkan oleh Allah dan begitu juga sebaliknya.

Pihak penerbit “Qalam” yang menerbitkan kitab itu dan juga banyak menerbitkan kitab-kitab yang berpengertian al-Shāfi‘iyyah telah memberi pendapatnya di dalam akhbar menyatakan bahawa setelah menyelidik dengan saksama bahawa ia berpuas

Negeri Sembilan.

hati mendapati bahawa kitab itu adalah daripada pendapat ahli-ahli al-salaf al-ṣālih - dan pengertian semacam itu ada pula di dalam pengertian imam-imam yang lain. Ia menyatakan juga bahawa mereka itu - ahli-ahli al-salaf al-ṣālih, mengucap dua kalimah syahadah, sembahyang, puasa, berzakat dan berhaji serta berimam dan menjadi makmum pula kepada imam-imam daripada mazhab imam al-Shāfi‘ī. Berjemaah sama di dalam masjid-masjid al-Shāfi‘īyyah maka untuk mencari kebenaran, pihak penerbit “Qalam” memohon kepada Raja-raja Melayu supaya jangan dahulu mengambil sesuatu keputusan sebelum pihak al-salaf al-ṣālih itu diminta pendapatnya ataupun diadakan majlis munazarah atau majlis muzakarah di antara kedua pihak supaya Sultan-sultan itu melakukan keadilan kerana sekalipun perlombagaan sebahagian besar daripada negeri-negeri Melayu di dalam Persekutuan Tanah Melayu itu berpandu kepada mazhab al-Imām al-Shāfi‘ī namun sepatutnya mereka tidak pula menutup kebebasan pendapat imam lain-lain atau pendapat-pendapat lain yang berpandu kepada kitab Allah dan sunah rasulnya Muhammad (S.A.W).

Sungguhpun kerajaan Negeri Sembilan telah menghantar sepucuk surat kepada wakil penjualan “Qalam” di Seremban menyatakan bahawa tidak dibenarkan menjual kitab Ibadat Rasulullah (S.A.W) di dalam Negeri Sembilan dengan memberi alasan bahawa kitab itu bertentangan dengan pengajaran al-Imām al-Shāfi‘ī yang dipegang di negeri ini maka tegahan berat sebelah tidak dengan tidak lebih dahulu menanya kepada pihak yang lain tentunya menimbulkan perkara-perkara yang tidak digemari akan terbit kerana orang nanti bertanya: apakah agama Islam hanya agama yang diajarkan oleh al-Imām al-Shāfi‘ī sahaja yang benar sedang lain-lainnya tidak benar? Adakah pengertian beragama sebegitu sempit?

Bagaimanakah nanti di rasa oleh lain-lain ahli

mazhab yang beramal pula dengan pengertian mazhabnya terhadap langkah kerajaan Negeri Sembilan itu padahal Ahli Majlis yang membahas perkara itu di Negeri Sembilan mengerti agama hanya seorang dua sahaja? Apakah pula dikatakan kalau kebebasan berfikir di dalam agama disekat padahal perkara-perkara syarak yang berlaku di dalam adat istiadat perpatih dan pembahagian-pembahagian harta perpatih yang bertentangan dengan syarak itu didiamkan?

Semuanya yang kita sebutkan ini bukan ditujukan untuk mencungkil perkara-perkara lain, tetapi sekadar menunjukkan bahawa ada banyak perkara-perkara lain akan berbangkit dan diungkit apabila kita tidak cukup luas berfikir dan mengambil sesuatu keputusan dengan kurang selidik tentang buruk dan baiknya.

Janganlah hendaknya pegawai-pegawai agama ataupun ulama-ulama yang ada kekuasaan di tangannya menggunakan kuasa yang ada di tangannya untuk membunuh kebebasan memberi pendapat di dalam agama; janganlah hendaknya ijihad seseorang di bunuh dengan kuasa yang ada di tangannya, kerana akibat yang demikian itu sangat merbahaya.

Orang nanti akan mengatakan: kalau sedap pada awak boleh bertaklid kepada lain mazhab tetapi kalau terasa tak sedap tidak mahu diterima dan segala gerak dan pendapatnya lain daripada mazhab al-Imām al-Shāfi‘ī akan dibunuh dan dibinasakan. Orang tentu akan bertanya kelak inikah dia agama Islam? Inikah dia pengikut ikhwah Islamiyyah yang dianjurkan oleh Islam dalam mengatasi semua soal yang berlainan-berlainan faham yang tidak akan mungkin disatukan?

Mudah-mudahan apa yang kita sebutkan di atas ini dapat perhatian umat Islam yang luas fikirannya

kita tidak memihak ke mana-mana tetapi untuk mencari kebenaran maka semolek-moleknya diadakan munāzarah atau muzakarah. Sebelum majlis itu dilaksanakan diadakan syarat-syaratnya semoga dengan itu hilang yang keruh dan terbitlah yang jernih. Tuan punya “Qalam” telah menyanggupi akan meminta pihak ahli al-salaf al-ṣālih mengadakan orang-orangnya jika Majlis Raja-raja Melayu berfikir perlu keadilan didirikan dengan mendengar dari kedua-dua pihak kemudian memberi kata muktamad. Kalau ini tidak diadakan terus sahaja dihukumkan, maka orang boleh menuduh bahawa kekuasaan yang ada di tangan Raja-raja digunakan tidak sewajarnya dan keadilan tidak diberi. Majlis Raja-Raja Melayu, menurut pendapat kita, wajib berdiri sama tengah di dalam hal serupa ini supaya kuasa raja terhadap agama tidak diletakkan pada tempatnya.

* * *

Islam Di Indonesia Dalam Bahaya

Sedikit masa dahulu Presiden Sukarno dengan tegas menyatakan bahawa ia tidak mahu mengubah Pancasila. Ia tidak mau bercorak merah (?) dan tidak mau pula bercorak hijau-ertinya ia tidak mahu negara Islam.

Kemudian, suatu berita yang lebih dahsyat telah disampaikan ke pengetahuan kita, bahawa dalam hari raya dahulu di Jakarta sebuah panitia telah dibentuk seperti biasa kerana mengadakan sembahyang hari raya di padang, dengan bersusah payah panitia itu telah membuat mimbar dan merentang tali serta meletakkan pelaung suara untuk orang bersembahyang. Tahu-tahu esok paginya apa yang dibuat mereka telah dikacau - mimbar dipusingkan, begitu juga tali yang dirintangkan itu telah diubah dan dikisar sebegini rupa.

Pagi-pagi itu orang datang berduyun-duyun tetapi alangkah hampanya panitia melihat apa yang terjadi dan terutamanya apabila mengetahui bahawa pelaung suara pula dikacau dan dirosakkan. Orang sembahyang di situ telah diejek oleh suatu kumpulan yang tertentu. Akhirnya panitia mengadakan protes tetapi malangnya bukannya orang-orang yang mengacau ditangkap tetapi orang-orang yang jadi panitia pula ditahan.

Dalam radio-radio Jakarta telah diumumkan bahawa beberapa ayat Al-Quran tidak boleh dibacakan lagi di khutbah-khutbah Jumaat.

Dengan apa yang tersebut ini terang sudah bahawa belum lagi Sukarno dengan komunis berkuasa, kebebasan agama telah dikacau. Hal ini patut menjadi perhatian kita di Malaya kerana harus pada suatu masa kita tidak lagi dilanggar oleh komunis dari China tetapi kita harus dilanggar oleh komunis dari Indonesia yang telah bertapak dengan tapaknya dibina bersama oleh pemimpin-pemimpin Nahdatul Ulama Indonesia yang lebih senang mendapat kerusi daripada berjihad untuk jalan Tuhan.

* * *

Melihat kepada keadaan-keadaan yang tersebut hendaknya menjadi pengajaran kepada kerajaan persekutuan di Tanah Melayu. Tidak ada ertinya kita hanya berkata sahaja untuk mengatakan bencikan komunis kalau tidak mahu bekerja dengan kuat menanam jiwa beragama kepada pemuda-pemuda, kerana hanya dengan agama itulah sahaja orang-orang akan terjauh daripada bahaya itu. Lihat sendiri sekarang pemuda-pemuda telah menjauhkan diri daripada agamanya dengan berdikit-dikit. Bahaya ini harus dibendung sebab nanti harus akan terjadi sesuatu yang tidak digemari kerana harus

Bersambung ke muka 8